

Program “Road Show Pengetua Bersama Waris dan Calon SPM 2021” Dapat Sambutan

ROAD SHOW PENGETUA BERSAMA WARIS DAN CALON SPM 2021

TARIKH	KELAS	MASA	MEDIUM
22 JUN	5 ALFA	2.30 PETANG	Google Meet (link GM akan diberikan oleh guru kelas)
23 JUN	5 BETA		
24 JUN	5 DELTA		
25 JUN	5 GAMMA		

#DISKUSI HALA TUJU SPM
#PERKONGSIAN KPI DAN SASARAN SPM 2021
#PENGLIBATAN MURID DALAM PDPR
#PROGRAM SARANA IBUBAPA

AG. ROZLAN BIN MANAN
Pengetua
SMK Taman Perumahan Bedaun

KEMENJADIAN SETIAP MURID ASPIRASI KAMI

Labuan, 29 Jun 2021 – SMK Taman Perumahan Bedaun (SMKTPB) telah melaksanakan program “Road Show Pengetua Bersama Waris dan Calon SPM 2021” yang bermula pada 23 Jun sehingga 29 Jun secara dalam talian melalui medium “google meet”. Perjumpaan secara dalam talian bersama waris dan calon SPM diadakan secara berperingkat yang melibatkan lima kelas tingkatan 5. Seramai 90 orang calon SPM 2021 hadir bersama-sama ibu bapa masing-masing dalam program tersebut. Turut hadir bersama dalam program ini adalah barisan pentadbir SMKTPB dan juga guru-guru mata pelajaran tingkatan 5.

Menurut Tuan Pengetua, En. Ag Rozlan bin Manan, objektif utama program ini adalah untuk memaklumkan kepada ibu bapa tentang sasaran pihak sekolah terhadap calon-calon SPM 2021. Menurutnya lagi, calon SPM 2021 merupakan calon yang istimewa kerana melalui norma pembelajaran yang baharu sejak tahun 2020. Mereka juga dianggap istimewa

kerana menjalani proses PdPr sejak 2020 sehinggalah kini ekoran pandemik Covid-19 yang melanda negara. Beliau amat berharap agar pandemik ini cepat berakhir bagi memastikan calon-calon SPM 2021 dapat mengikuti pembelajaran secara bersemuka. Untuk makluman, seramai 90 orang calon akan menduduki peperiksaan SPM pada tahun 2021. Kehadiran ibu bapa dalam program ini amatlah diharapkan oleh pihak sekolah kerana dalam keadaan PdPr sekarang, ibu bapa dianggap sebagai tunjang utama dalam merealisasikan impian pihak sekolah untuk memastikan anak-anak hadir penuh dalam sesi PdPr. Tanpa sokongan ibu bapa, anak-anak sudah pasti akan tercicir dalam pembelajaran yang kini hanya berlangsung di rumah.


Dalam ucapannya juga, En. Ag Rozlan turut menjelaskan kepada ibu bapa bahawa pelaksanaan PdPr sememangnya tidak sama dengan pembelajaran secara bersemuka. Pembelajaran secara bersemuka membolehkan semua guru memberikan 100% tumpuan dan bimbingan kepada semua murid terutamanya murid yang masih lemah dalam penguasaan mana-mana mata pelajaran. Dapatan daripada kehadiran PdPr, sikap murid-murid yang tidak serius dengan PdPr merupakan langkah utama kepada pihak sekolah untuk melaksanakan program ini demi kepentingan anak-anak. Ibu bapa merupakan kekuatan dalam kejayaan pelaksanaan PdPr kerana anak-anak sepenuhnya berada di rumah. Beliau yakin dan percaya semua guru akan menggunakan pelbagai kaedah yang terbaik untuk memberikan bimbingan walaupun melalui PdPr.

En. Ag Rozlan turut menjelaskan bahawa sepanjang pencapaian SPM 2018 sehingga SPM 2020, komitmen daripada ibu bapa amat membanggakan kerana sentiasa bekerjasama dengan pihak sekolah untuk memastikan anak-anak mencapai kecemerlangan dalam SPM. Hal ini terbukti apabila keputusan SPM sejak tiga tahun kebelakangan ini semakin meningkat iaitu SPM 2018 (GPS 5.34), SPM 2019 (GPS 5.14) dan SPM 2020 (GPS 4.76). Semua calon SPM 2020


juga layak mendapat sijil kerana pencapaian 100% lulus dalam mata pelajaran Bahasa Melayu dan Sejarah. Peningkatan pencapaian ini jelas menggambarkan bahawa adanya kerjasama dan komitmen daripada ibu bapa dengan pihak sekolah. Adalah menjadi harapan pihak sekolah agar semua calon SPM 2021 memperoleh sekurang-kurangnya gred "C" dalam semua mata pelajaran untuk melayakkan mereka menempatkan diri ke peringkat seterusnya. Layak sijil untuk calon SPM ditentukan oleh dua mata pelajaran utama iaitu Bahasa Melayu dan Sejarah yang wajib lulus.

En. Ag Rozlan juga menyampaikan amanat kepada semua calon SPM agar memanfaatkan masa yang ada dengan mengulang kaji pelajaran dan menggunakan sepenuhnya waktu pembelajaran secara PdPr. Murid-murid diminta untuk mengorbankan masa mereka pada tahun ini demi meraih kejayaan dalam SPM 2021. Baginya setiap orang yang berusaha pasti akan berjaya. Guru-guru akan sentiasa bersedia untuk membimbing murid-murid walaupun secara PdPr.

Pada akhir ucapannya, beliau memberikan kata-kata semangat kepada semua murid dengan mengambil contoh empat golongan manusia untuk renungan bersama. "Pertama, orang yang rajin dan pandai pasti akan berjaya. Kedua orang yang pandai tetapi malas, hasilnya akan gagal. Ketiga, orang yang lemah tetapi rajin berusaha, juga pasti akan berjaya dan yang terakhir, orang yang lemah serta malas pasti akan mencipta kegagalan dalam hidupnya." Harapan beliau agar ibu bapa sentiasa bersama dengan guru-guru dan pihak sekolah untuk memastikan kecemerlangan anak-anak dalam SPM 2021. Semoga Covid-19 cepat berakhir agar semua murid dapat kembali belajar secara bersemuka di sekolah



Kehadiran murid 5 Beta dan ibu bapa (23 Jun)



Kehadiran murid 5 Gamma / PVMA dan ibu bapa (25 Jun)

Berita Oleh : SMK Taman Perumahan Bedaun

Program Munajat Warga Pendidik WP Labuan Anjuran SMKTPB Berjaya

Dilaksanakan



Labuan, 1 Julai : Panitia Pendidikan Islam SMK Taman Perumahan Bedaun (SMKTPB) sekali lagi berjaya menganjurkan Program Munajat Bacaan Yasin dan Doa Warga Pendidik untuk kali ke-4 sebagai langkah mencegah penularan pandemik Covid-19. Program ini mendapat jalinan kerjasama dengan Jabatan Pendidikan WP Labuan dan juga Sekolah-sekolah di WP Labuan.

Majlis yang berlangsung secara dalam talian pada 25 Jun 2021 dimulakan dengan bacaan Yasin selepas solat Maghrib di kediaman masing-masing. Turut hadir bersama dalam program ini ialah Pengarah Pendidikan, Jabatan Pendidikan Wilayah Persekutuan Labuan, Encik Yusup Haji Mohamad, Ketua Penolong Pengarah, Sektor Pendidikan Islam, Ustazah Hajah Kamariah binti Salim, Pegawai-Pegawai JPNWPL, guru-guru WP Labuan, ibu bapa dan juga murid-murid. Pengetua SMKTPB, En. Ag Rozlan Manan turut hadir bersama dengan barisan pentadbir dan guru-guru.


Menurut moderator, Ustaz Mohd Daud bin Abdul Rahman, tujuan utama program ini adalah untuk mendoakan kesihatan dan keselamatan semua warga pendidik, petugas di barisan hadapan, murid-murid, keluarga dan masyarakat agar terhindar daripada ditimpa musibah wabak Covid-19.

Program ini juga bertujuan untuk memohon kepada Allah SWT agar mereka yang dijangkiti wabak Covid-19 akan kembali sembuh dengan segera dan mendoakan agar negara kita serta dunia akan bebas daripada wabak ini. Di samping itu, program ini juga diadakan untuk mendoakan kesembuhan buat adik Muhammad Najman bin Nazmi dari Tingkatan 1 Delta yang menghidap penyakit buah pinggang.

Selesai bacaan Yasin yang dipimpin oleh Ustaz Mohd Azman bin Abd. Rahim dan bacaan doa yang dipimpin oleh Ustaz Erzadiansyah bin Udad, majlis diteruskan dengan ucapan daripada Pengetua SMKTPB, En. Ag Rozlan Manan. Dalam ucapannya, beliau merakamkan ucapan terima kasih atas kehadiran semua dalam menjayakan program ini secara dalam talian.

Menurutnya, program ini merupakan sebahagian daripada usaha pihak sekolah dan JPNWPL dalam menangani pandemik Covid-19. En. Ag Rozlan turut memohon kerjasama daripada semua ibu bapa untuk sama-sama memantau pembelajaran anak-anak di rumah memandangkan tempoh pelaksanaan PdPr yang masih panjang. Walaupun PdPr tidak sama dengan pembelajaran secara bersemuka, namun beliau yakin dengan adanya kerjasama daripada ibu bapa, anak-anak tidak akan tercicir dalam pembelajaran walaupun secara PdPr.

Beliau juga mengharapkan agar semua hadirin dapat bersama-sama mendoakan kesejahteraan dan keafiatan untuk adik Mohd Najman bin Nazmi (murid SMKTPB) yang menghidap penyakit buah pinggang dan akan menjalani pembedahan. Beliau turut berharap agar kita semua sentiasa dilindungi dan mudah-mudahan doa yang dipanjatkan akan dimakbulkan oleh Allah SWT.



En. Ag Rozlan menyampaikan ucapan kepada semua yang hadir. Selesai ucapan daripada Pengetua, majlis diteruskan dengan ucapan daripada Ketua Penolong Pengarah, Sektor Pengurusan Maklumat ICT, Encik Mohd Nazrien bin Abdul Rahman. Dalam ucapannya, beliau merakamkan ucapan syabas dan tahniah kepada SMKTPB kerana berjaya melaksanakan program ini. Beliau juga merakamkan ucapan setinggi-tinggi tahniah kepada SMKTPB kerana peningkatan pencapaian dalam keputusan SPM 2020 dengan pencapaian GPS 4.76.

Walaupun banyak halangan yang terpaksa dihadapi oleh pihak sekolah dengan adanya pandemik Covid-19 dan pelaksanaan PdPr, namun kejayaan dalam SPM 2020 telah membuktikan bahawa semua usaha telah memberikan hasil yang terbaik. Harapan beliau agar pencapaian SPM 2021 akan lebih cemerlang walaupun masih dalam suasana pandemik Covid-19.

Sememangnya anak-anak SPM 2021 merupakan insan terpilih untuk berada dalam situasi ini. Beliau mendoakan agar anak-anak yang akan menduduki SPM 2021 akan memperoleh kejayaan yang cemerlang. Semoga usaha kita semua akan dapat membantu memutuskan rantai pandemik Covid-19.

Sesungguhnya setiap musibah yang Allah turunkan ada hikmahnya yang tersendiri. Pada akhir ucapannya, beliau berharap agar wabak ini segera diangkat oleh Allah SWT dan mendoakan agar kita semua dapat menjalani kehidupan seperti biasa.

Majlis diakhiri dengan solat Isyak dan solat Hajat di rumah masing-masing. TAMAT.

Berita Oleh : SMK Taman Perumahan Bedaun